

Powšitkowne WOZJEWJENJA

njedźelu, 20. měrca 2016

Křižowy puć młodžiny w Pančicach-Kukowje

Dekanatna młodžina modli so křižowy puć bołmončku, njedźelu, 20. měrca, w Pančicach-Kukowje. Młodostni zetkaja so w 14 hodź. w klósterskej cyrkwi. Wšitcy młodostni su wutrobnje přeprošeni, křižowy puć sobu kročić. Njeh přinjese sej kóždy Wosadnik sobu. Zdobom prosy so wo to, zo ma kóžda wosadna młodžina swoju dekanatnu młodžinsku chorhoj sobu.

Přiležnosć k swjatej spowědži w Róžeńće

póndźelu, 21. měrca 18.30 - 19.30 hodź.	farar M. Nawka, farar M. Delerńk, kapłan G. Malinowski, farar J. Magiera
wutoru, 22. měrca 18.30 - 19.30 hodź.	farar M. Anders, farar M. Nawka, farar M. Kleiner, farar M. Ulrich

Družki na zjězd katolikow

Na zakónčacej Božej mši 100. zjězda katolikow Němskeje, kotraž budže njedźelu, 29. meje, dopołdnja na Augustusowym naměsće w Lipsku, su holcy prošene, zo bychu jako družki sobu začahnyli. Wone změja w přednim džělu swoje městna. To wobkrući Christina Vogl, sobudželaćerka w zarjedže zjězda za liturgiski wobłuk. Wona doda, zo je tež planowane, zo so jedna próstwa w serbskej rěči přednjese.

Družki wot 9. lětnika su prošene, zo bychu so na tutej kemšach k wjetšej česći Božej wobdžělili. Jězbu z busom do Lipska njetřebaja wone zapłaćić. Wotjězd budže něhdže w 6.30 hodź. Wone měli hižo zdrasćene być. Po kemšach, kotrež zahaja so w Lipsku w 10 hodź, so zaso domoj nawróća. Zajimče njeh so prošu hač do póndzele, 18. apryla, w redakciji Katolskeho Posoła, telefonowe čisło (0 35 91) 55 02 12 abo z mailku na Katolski@Posol.de přizjewja.

Z busom na zjězd katolikow

Štóž chce sej na 100. zjězd katolikow Němskeje do Lipska dojeć, ma k tomu tež z busom dvě móžnosći. Radworske Šmitec wozydłownistwo poskičuje jězbu sobotu, 28. meje, kaž tež njedźelu, 29. meje. Sobotu móža zajimcy flair a tójšto poskitkow zjězda dožiwić, mjez druhim cyrkwinu milu, na kotrež so biskopstwa a wšelake zwjazki předstaja. Za někotrežkuli zarjadowanje pak je zastupny lisćik zjězda katolikow třebny. Nadrobnišo je to pod www.katholikentag.de wopisane. Bus wotjědže něhdže we 8.00 hodź. z Łužicy a něhdže w 17.30 hodź. z Lipska. Njedźelu – to je njedźela, na kotrež su w mnohich serbskich wosadach procesiony z Najswjećišim po wsy – su w Lipsku na Augustusowym naměsće w 10 hodź. zakónčace kemše zjězda katolikow. Předsyda Němskeje biskopskeje konferency, kardinal Reinhard Marx, budže hłowny celebrant. K tomu wotjědže bus něhdže w 6.30 hodź. z Łužicy a něhdže w 13.00 hodź. z Lipska. Zajimcy měli so pola Šmitec wozydłownistwa přizjewić, telefonowe čisło (03 59 35) 28 60.

Zhromadny dzeń za 1. a 2. lětnik

Pod hesłom „Jězus z mortwych stanył je, haleluja!“ přepróšuje dekanatne dušepastyrswó dźěći 1. a 2. lětnika pjatk, 1. apryla, wot 9 do 15 hodź. do Don Boskoweho domu we Worklecach. Zajimcy njech so prošu hač do wutory, 29. měrca, pod telefonowym čisłom (03 57 96) 8 87 07 we Worklecach přizjewja. Za wudawki dnja zběra so wot kóždeho wobdźělnika přinošk, kotryž wučinja štyri eura.

Jutrowne překwapjenki w klóšterskej zahrodźe

Jutrownu srjedu, 30. měrca, su dorosceni a dźěći do klóšterskeje zahrody w Pančicach-Kukowje na dyrdomdejske popołdnjo přepróšeni. Wot 13 do 17 hodź. móža na přikład wowčerja z jutrownymi jehnjatami dožiwić, nalětnje spěwy z dźěćacym chórom Drježdžansko-Mišnjanskeho biskopstwa spěwać, kreatiwni być abo wot rjadnicow zhonić, što je klóštrje noweho.

Časowy přehlad křižerskich procesionow

Dokładny přehlad časow wšitkich křižerskich procesionow kaž tež čara, po kotrejž na tampuću a dompuću jěchaja, je na internetowej stronje www.posol.de a tam pod „Časy křižerskich procesionow“ podaty. Přehlad je w serbskej a němskej rěči zestajany.